



Uniun ceciliana cun nov parsura

Sco nov parsura da l'Uniun ceciliana da la Surselva è il musicist Albert Spescha vegnì elegì.

5



Domat planisescha in edifizis districtual

Cun in edifizis nov en il center dal vitg vul Domat accentuar sia muntada en il district dal Plaun.

7

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuira, tel. 081 920 07 10, mail: redaktion-lq@suedostschweiz.ch

Dis litterars a Domat cun plüssas novaziuns

■ (anr/fa) In nov comitè d'organisaziun, in nov andamaint dal Premi Term Bel e l'emprim e-comic en rumantsch. Quai èn mo trais exempels da las novaziuns dals 24avel Dis da litteratura. Venderdi, ils 7 fin dumengia, ils 9 da november ha lieu a Domat la 24ava ediziun dals Dis da Litteratura. Il tema da quest onn è «retro»: I dat da tutta sorts sguards retrospectivs, en la litteratura, en la musica e per part er en il teater. Ils Dis da

litteratura han quest onn organisà per l'emprima giada *Laura Decurtins* ch'è creschida si a Cuira, *Sara Hermann* che ha passentà sia uffanza a Samedan, *Sereina Nay*, oriunda da Trun, e *Natalia Tuor* che deriva da Rabbius. Nov è era ch'ils nums dals victurs dal Premi Term Bel vegnan communitgads pir dumengia a chaschun da la surdada dal premi.

> PAGINA 15

Perdetga dalla «Passiun da Sumvitg»

Il mir digl «iert dallas olivas» dado Sumvitg vegn sanaus

DA HANS HUONDER / ANR

■ Igl «iert dallas olivas» a Sumvitg vegn sanaus. El ei ina dallas davosas perdetgas dalla «Passiun da Sumvitg». L'auter onn duein las lavurs vegnir terminadas. Igl «iert dallas olivas» ei in da treis loghens dalla presentaziun da pli baul dalla Passiun. Davart ils datums dallas presentaziuns dat ei paucas informaziuns concretas. Ins sa che la «Passiun da Sumvitg» vegneva arranschada il 18avel ed il 19avel tschentaner. Essend che bia gliued dil vitg era involvida en quellas presentaziuns havevan ellas buca liug mintg'onn. Dado il vitg, egl «iert dallas olivas», vegneva mintgamai fatg l'entschatta dalla presentaziun. Dapi che la Passiun ei buca pli vegnida presentada ei vegniu dau pauca atenziun a quei liug, oravontut al mir. Ils onns 1990 ei ina part dil mir allura vegnida sanada ed avon rodund in onn han las lavurs da manteniment dall'ulteriura part dil mir entschiet. Quella part era ida fetg en decadenza. Entochen el decurs digl onn vegnent duess il mir puspei survir a siu intent, num-



Il mir digl «iert dallas olivas» dado Sumvitg duei puspei survegnir sia fuorma da pli baul.

FOTO H. HUONDER

madamein alla cunfinaziun digl «iert dallas olivas». *Sep Benedetg Candinas* che meina las lavurs ei satisfatgs ch'ei reussescha da mantener quei liug historic cun

il mir schetg che paradescha sur la via cantunala. Las lavurs da sanaziun ein pusseivlas grazia al sustegn da differentas varts. Egl avegnir duei igl «iert dallas oli-

vas» esser oravontut in liug da paus e ruaus ed in'attracziun pil turissem.

> PAGINA 3



Sut la bitgetta dil dirigent Clau Scherrer va il Chor dalla claustra da Mustér primavera proxima sin viadi musical per derasar il clom dalla pasch ut unum sint... ch'els (ils cartgauns) seigien units.

MAD

Padrinadi per pasch, giuventetgna e musica

■ (anr/sr) Ut unum sint... ch'els (ils cartgauns) seigien units ei in impurtont clom da pasch e cun quel vulan las scolaras ed ils scolars dil gimnasi dalla claustra da Mustér ir sin viadi musical. Ut unum sint ei in project da gronda muntada e primavera proxima concertescha il chor dalla claustra ensemen cugl ensemble deCanto, las sopraniestas *Letizia* e *Judit Scherrer* ed in orchester sinfonic sut la bitgetta da

Clau Scherrer en otg loghens naven dalla tgina dil Rein entochen a Cologna en Tiaratudestga. Cun agid dil Lions Club Rheinquelle tschera il gimnasi dalla claustra da Mustér persunas ni fatschentas ch'eiin promtas da surprender in padrinadi per possibilitar la realisaziun dil project ch'ei calculaus cun expensas da rodund 400 000 francs.

> PAGINA 5

Divertent en tuttas furmas

DA GION NUTEGN STGIER / ANR

■ A partir da venderdi fin dumengia envida l'Argo Grischun a Cazas ad in teater. Acturas ed acturs èn persunas cun in impediment spirtal e corporal. Dapli ch'ina ura divertiment da las persunas che sa legran da sa presententar al public. Avant quatter onns aveva l'Argo Grischun preschentà cun success il teater ils «Argonauts». Ussa segna danovamain *René Schnoz* per la reschia dal teater «Die Stunde da wir voneinander nichts wussten». Il Sursilvan ha quella sensibilitad,

la pazienza e cunzunt er la charezza da mussar a las persunas cun impediments co fascinar il public e co attrair la simpatia da quel. Cun il cabarettist *Rolf Schmid* ha el in bun partenari che chapescha er fig bain las lunas dals 60 acturs ed acturas ed in um che ha plashair da collavurar cun ils protagonistis impedids. Ina nota singulara survegn il teater er entras la fig buna musica e betg il davos er entras ils numerus costums che procuran per blera color sin tribuna.

> PAGINA 2



La paletta dils vinars e liquors dalla Destillaria Daguot a Glion ei gia vasta. Il vinars da tschereschas ei gia premiaus.

FOTO G. VENZIN

Pissiu pil niebel daguot

■ (anr/gv) Dapi in onn e miez brischan *Benedetg Simeon* e *Robert Cathomas* vinars. Ella *Destillaria Daguot a Glion* han els gia creau entgin daguot niebel ed era contonschiu arbagias per in vinars da tschereschas. Sonda, ils 15 da quest envidan els ad in di dallas portas aviartas alla Via dil Rein sut e festiveschan cun quella caschun l'avertura ufficala dalla destillaria. Il vinars brischan ils dus amitgs e quinaus ord spir pissiu. Igl ei la pissiu da crear in daguot

extraordinari. La paletta da products barschai e creai tochen dacheu cumprova ch'ils dus brischarvinars tschentan la creativad e la qualitat el center. Sper las butteglas emplenidas cul vinars da tschereschas premiau ein butteglas cun vinars e liquors da puma ed jarva. Entgins vinars e liquors ein raffinau cun mèl d'aviuls. «La creativad tschenta negins cunfins». Quei ei in dils mottos dils dus «giuven» brischarvinars.

> PAGINA 7



Ina da las numerusas scenas sin il plaz, nua che tuts s'inscuntran durant il teater divertent.

FOTO G. N. STGIER



Servetsch d'abunents e da distribuiziun: tel. 0844 226 226 mail: abo@somedia.ch